

LXVII

1265-III-13, Sevilla.—Alfonso X a los vecinos de Lorca. Concediéndoles el quinto de las cabalgadas y eximiéndoles del pago de portazgo de las presas que hicieran. (A. M. Lorca, perg. n.º 20)

Don Alffonso, por la gracia de Dios rey de Castilla, de Toledo, de Leon, de Gallizia, de Seuilla, de Cordoua, de Murcia, de Jahen et del Algarbe, a todos los omnes que esta carta vieren, salut et gracia. Mando que todos aquellos que caualgaren de Lorca, caualleros et adalides et almugauares de cauallo, et amucadenes et vallesteros et peones, que de toda quanta ganancia Dios les diere de moros et de moras et de otras cosas que sean de nuestros enemigos, que non den ende quinto nin carçelage nin portadgo nin otro derecho nenguno en Lorca nin en nenguna [villa nin en nengun lugar] de toda mi tierra. Et deffiendo que el almuxerif nin otro omne non ge lo demanden nin les contralle nin les embarque nenguna cosa de lo suyo por esta razon, nin de prenderles sinon por debdo propio que ouiesen a dar o por fiadura que ellos mismos ouiesen fecha, que [qualquier] que lo fiziesse, a el et a quanto que ouiesse me tornaria por ello.

Dada en Seuilla, el rey la mando viernes XIII dias de março, era de mill et trezientos et tres annos. Yo Garcia Dominguez la fiz escriuir.

LXVIII

1265-III-13, Sevilla.—Alfonso X al concejo de Lorca. Eximiéndoles del quinto de las cabalgadas, portazgo y carcelaje de cuanta ganancia obtuvieran de los moros. (A. M. Lorca, perg. n.º 9)

Sepan quantos esta carta vieren commo yo, don Alfonso, por la gracia de Dios rey de Castiella, de Leon, de Gallizia, de Seuilla, de Cordoua, de Murcia, de Jahen et del Algarue, por grand sabor que e de fazer bien et merçed al con-



çeo de Lorca, mando que de todas quantas caualgadas fizieren de Lorca contra los moros, que de la ganancia que Dios les diere de moros et de moras et de otras cosas, que non den ende quinto nin portadgo nin carçelaie nin otro derecho nenguno en Lorca nin en toda mi tierra. Et mando que ninguno non sea osado de ge lo demandar nin de enbargalles por esta razon, ca qualquier que lo fiziese pesarmie et non ge lo consintria.

Dada en Seuilla, el rey la mando viernes XIII dias de março era de mill et CCC et tres annos. Yo Garcia Dominguez la fiz escreuir.

L X I X

1265-VIII-25, Córdoba.—Alfonso X al concejo de Orihuela.— Concediéndole el fuero y franquezas de Alicante. (A. Mun. Orihuela, Libro de privilegios, n.º 2588, fols. 1 r-v)

Don Alfonso, por la gracia de Dios rey de Castilla, de Toledo, de Leon, de Galicia, de Seuilla, de Cordoua, de Murcia, de Jahen et del Algarue. Al concejo de Orihuela, salud et gratia. Vi uestra carta et uestros mandaderos Pedro Fustel et Andres, que me enbiastes et mostraronme uestra hacienda et pidieronme merced que uos diesse fueros et franqueças et mejoria de heredamientos a aquellos que sodes et morades en Orihuela, que nos ficiestes et nos facedes y seruicio. Et esto tengo por bien et mando que ayades los fueros et las franqueças que an los de Alicante en todas cosas et que vsedes por ellas. Et quando yo mandare partir Orihuela, uos me enbiaredes uestros omes buenos de uestro concejo, estonce dar uos e uestros fueros et uestras franqueças por mio priuilegio et mandar uos he dar mejoria a todos los que sodes moradores et me ficiestes seruicio en esta guerra. Et porque esto non venga en dubda, mande uos dar esta mi carta abierta, seellada con mio seello de cera coldago.

Fecha la carta en Cordoua por mandado del rey martes XXV dias andados del mes de agosto era de mill et treçientos et tres anyos. Joan Ferrandç la fiç escreuir.

